

Asocijacija mladih SDA Batva prethodnih dana učestvovala je u humanitarnoj akciji "Jedna šolja, jedan korak - jedan korak, jedan osmijeh" koja je pokrenuta kako bi se prikupio novac za operaciju kukova četverogodišnje Iris iz Tuzle.

Malenoj Iris, koja je rođena prijevremeno, doktori su dijagnosticirali cerebralnu paralizu s kojom se ona, zajedno sa svojim roditeljima, bori. Naida Zulum Ključić, majka četverogodišnje djevojčice, ništa nije prepustila slučaju te je krenula u „bitku“.

Budući da ne može raditi jer se mora brinuti o Iris i sinu, koji također ima zdravstvenih problema, Naida je pokrenula mali biznis – ukrašavanje šolja.

Šolje sa slikama i natpisima Naida ukrašava po želji „kupaca“, a prodaje ih po simboličnim cijenama da bi, kako i sama kaže, prodala što više šolja i prikupila novčana sredstva koja su potrebna.

Za operaciju, kao i postoperativni tretman je potrebno još oko 6.000KM.

Odlučni da pomognu, članovi AM SDA Batva su, u okviru svojih mogućnosti, sakupili sredstva i uzeli učešće u ovoj akciji. U aktivnost se uključio i predsjednik AM SDA Tuzla dr.sc.Senad Mehmedinović koji radi sa populacijom osoba sa motoričkim poremećajima. „Posebno mi je drago što su se mladi iz Batve kupovinom šolja odlučili pomoći djevojčici koja ima cerebralnu paralizu. Mi ćemo kao Asocijacija mladih uvijek promovisati participativizam u društvenoj zajednici i zalagati se za društvo jednakih mogućnosti za sve“ – kazao je Mehmedinović.





